

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Lai Autonomous District Council, inthlanpui kumin December 3 a neih turah candidate 80 an awm dawn ta.
- 2. Hnam inpumkhatna leh inunauna chawilar nana Assam Rifles buatsaih 'National Integration Tour-2025' a kal tur zirlaite chu Larsap, General (Retd) Vijay Kumar Singh an a vailiam.
- 3. Saudi Arabia-a Madina a bus leh diesel tanker insut avangin an thi.
- 4. Northern Zonal Council (NZC) meeting chu vawiin khan Haryana-a Faridabad-ah Union Home Minister Amit Shah-a hova neih a ni.

<><><>

LADC CANDIDATES

Lai Autonomous District Council, inthlanpui kumin December 3 a neih turah candidate 80 an awm dawn ta.

He inthlan chuh tuma hming pe lutte inhnuhdawh huntawp, vawiin chhun dar 12 thleng khan mipahnih an in hnukdawka, Sangau West atanga Independent a chuh tuma hming pe, Pu C.Lallungmuana leh Paithar bial atanga Independent thova chuh tum Pu J.Thangkhuma te chu an inhnukdawka, tihian LADC inthlanpui neihturah bial 25 ah Candidate 80 an awm a ni.

MDC bial 25 ah Candidate pahnih awmna bial paruk awmin, heng bial ruk zinga bial hnih, Sangau East leh Sangau West chu BJP leh ZPM inmalbeihna tur niin bial dang pali, Sangau South, Lungtian, Bualpui West leh Lawngtlai-III te chu MNF leh ZPM in malbeihna tur a ni, Candidate pathum awmna bial sawmpakhat a awma, Candidate pathumna awmna bial te chu Cheural, Lungpher South, Vawmbuk, Lawngtlai Bazar, Lawngtlai Vengpui, Council Veng, Lawngtlai AOC, Chandmary, Pathar Diltlang South leh Sekulh te niin, College Veng, Sakeilui, M.Kawnpui, Tuithumhnar leh Vathuampui te chu Candidate pali awmna niin, Bualpui East, Chawngte ‘P’ leh Bungtlang South te chu Candidate panga awmna a ni.

Inthlanna tluangtaka neih a nih theih nan Election Office lam chuan atahtawlin buaipui ngai, chhun zan zawmin an buaipui a, mawhphurhna nei hrang hrangte pawh an mawhphurhna thtaka an hlen theih nan Training neihpui thin an ni.

<><><>

GOVERNOR

Hnam inpumkhatna leh inunauna chawilar nana Assam Rifles buatsaih 'National Integration Tour-2025' a kal tur zirlaite chu Larsap, General (Retd) Vijay Kumar Singh an vawiin khan Raj Bhavan, Aizawl atangin a vailiam.

Larsap General (Dr) Vijay Kumar Singh chuan tour kaltlanga thil zir turte chuan zirna mai bakah an thanlen zelna kawngah hriatna leh thiamna pein a pui dawn a ni, a ti a. Hmanni maia hawn thar Sairang Railway Station atanga tour an tan tur chu lawmawm tiin, nakin lawkah Rel-in chhim lam District-te a la thlen thuai dawn thu a sawi a. India rama khawpui pawimawh tak tak an tlawh tur chu lawmawm a tih thu sawiin, India ram hnam ziarang leh nunphung danglam nasat zia an hmuh dawn avangin zirlaite chu midangte hnam ziarang leh nunphungte chika hriat thiam tum turin a chah a ni.

National Integration Tour chuan inunauna leh inpumkhatna a hrin chhuah ngei a beisei thu sawiin, an thil hmuh leh hriatte an theihnghilh mai loh nan diary-ahte chhinchhiaha nakin zel atana hman tangkai tum turin a fuih a ni.

Lunglei, Siaha leh Lawngtlai District atanga thlan chhuah Zirlai 20 leh Zirtirtu 2 bakah anmahni hruaitu Assam Rifles official-te National Integration Tour ah hian an tel a, Mizoram chhuahsanin Guwahati an pan a ni. Guwahati, Amritsar leh Delhi-a hmunhma pawimawh leh hriat hlawh tak takte bakah Sipai hmun pawimawh thenkhatte an tlawh dawn a. He tour kaltlang hian zirlaite'n India ram an hriat chian leh zual theih nan India culture, nunphung, thiamna leh ei leh in hrang hrangte hmelhriat tir tum a ni a; an tawnhriatte chuan zirna lamah pawh a puih ngei beisei a ni. Ruahman dan chuan November ni 29 ah tour zo felin Mizoramah an rawn let leh dawn a ni.

<><><>

NATIONAL PRESS DAY

Vawiin khan 'National Press Day 2025' pualin Information & Public Relations Department leh Mizoram Journalist Association chuan DIPR Auditorium-ah hun an hmang a; khuallian I&PR Secretary Pi Betsy Zothanpari Sailo chuan thuthar thehdarhtute chu huai taka dikna kengkawh ngam turin a chah a ni.

Pi Betsy Zothanpari Sailo chuan mipui hriat tura thu puanzar kawngah a dik leh dik loh zirchiang hmasa a, thudik chauh puangzar turin thuthar thehdarhtute a fuih a; a tha zawnga sorkar kaihruai thei tura ngaihtuahna seng thin turin a chah a ni.

(Byte - Pi Betsy Zothanpuii Sailo)

I&PR Secretary chuan MJA membrete chu hriselna ngaipawimawh tura chahin incheina leh news zawn kawngah pawh hmasawn zel a pawimawh thu leh, MJA-in hma a sawn zel theih nan sorkar pawhin theihtawp a chhuah thu a sawi.

MJA President Pu Lalrambuatsaiha chuan khawvel ram ropuite chu thuthar thehdarhtute zalenna ram an nih thu leh press mite chu mipui rorelna rama hmun pawimawh tak changtu '4th pillar of Democracy' a nih thu sawiin, thuthar thehdarhtu kalkhawmte chu sorkar khalngil tura theihtawp chhuah turin a chah bawk a ni.

National Press Day 2025 hmannaah hian kum 20 chhung I&PR Director lo ni tawh Pu LR Sailo, MIS (Rtd), tun thla ni 3-a DoNER Minister Jyotiraditya Scindia hnen atanga a hnathawh that avanga 'Bharat Ratna Dr. Bhupen Hazarika National Award 2025' dawngtu leh, MJA member/accredited journalist Dr. Lalnunkimi Colney, hmeichhe zinga journalism lama doctorate degree nei hmasa berte hnenah chawimawina a hlan a ni.

National Press Day hi District dangah pawh hman a ni.



MNF

MNF President Pu Zoramthangan MNF hruaitute inkarah buaina a awm lo a ti a, inthlannaa an chak hnuah chanvo inchuhin an buai dawn an ti a, hetiang lamah hian MNF an buai ve ngai lo a an buai dawn lo a ti.

MNF Party hiann vawiin khan Aizawla Vanapa Hall-ah Dampa Bial by-election 2025 a Dr R Lalthangliana thlan tlin a nih pualin 'Pathian hnena lawmthu sawi inkhawm' an hmang a; MNF president Pu Zoramthanga chuan thu sawiin, Mizoram mipuiin ZPM sorkar leh an policy-te an hnawl tan ta a ti a, Mizorama inthlan lo awm zel tur atan Dampa By-election chu darthlalang ang a ni a, Zoram mipui hmuh dan a nih thu leh Bana Kaih Policy te, ZPM sorkar leh an hruaitute hnawl an nih mek thu a sawi bawk.

(Byte - Pu Zoramthanga)

Dampa Assembly bial MLA thar Dr R Lalthangliana chuan thlan tlin a nihna chu Pathian vang a nih thu a sawi a; tling ve ta lo party dang candidate-te chu hmelma an nih loh thu sawiin, a tawngtaisak zawk thu a sawi a, campaign chhungin boruak chhia a thleng lo chu a lawm thu leh vote 562-a a tling chu a chapo lohna tura Pathianin a tawk chauha atana a ruat a nih thu a sawi.

MNF party worker-te chu chapona tlang atangin hlawhtlinna a awm thei lo tih hre tura a duh thu sawiin Dr R Lalthangliana chuan, inthlan kaihnawihha Mizoram People Forum (MPF)-te hmalakna fakawm a tih thu a sawi bawk.

(Byte - Dr R Lalthangliana)

Dampa bial by-election neih zawh taka hnehna chang zo ta lo Pu Vanlalsailova chuan vawiina ZPM Party chhung inkhawm Aizawla neihah thusawiin an chak loh avanga tute emaw mawhpuh kual tur a zawng lo va, a chhan bul ber chu amah a ni tih a pawm thlap a ti a. He chak lohna hi an inhmuh chhuah nan Lalpa’n malsawm se a duh tih sawiin kum 2023 inthlanpuia kalphung thar mipui sorkar a din theihna tura a thli tlehtirtute zinga hmanruaah Pathianin a hmang ve a; mahse, inthlanah a tling zo lo a. By election-ah a tling lo leh ta a, a tuartu leh hrehawm ti ber chu amah a ni a, mahse, ZPM thil tum tihlawhtlinna turin tuna a dinhmun chu darthlalang atan a rawn hungah a ngai a, theih tawp chhuahin he ram tan hma a la zel dawn a ti.

Dampa Bial By-election BJP Candidate Pu Lalhmingthanga pawhin vawiina Aizawla an party office ah thusawiin, Dampa bial By-Election ah BJP-in an beisei Result an hmu lo a, hemi ah hian mawhpuh tur mimal ah an awm lo a ti a, BJP ka

chhuahsan leh mai ring mi tam tak an awm a, nimahsela BJP chhuahsan a tum lo a ti.

Dampa bial ah BJP Member tak tak an tlem hrih hle a, an bul ñanna a têt deuh bik êm avangin, hmalak a harsa bik a, Dampa bial ah hian BJP a din chhuahna atan theihtâwp chhuahin hma an la zel dawn a ti.

Congress party chuan Congress Bhavan ah Political Session an hmang a, MPCC thupuangtu Pu Lalbiakzama chuan Zoram mipuiten Congress nge nge an ti leh dawn a ti a, an sulhnu a tha ber a ti a, vawiina sorkar mekte chu thal vawi 2 an paltlang tawh hnu pawha kawngpui la siam thei lo an ni a. Development dang chu vana rah ang a ni, a ti.

MNF chu vawi tam sorkar tawh, ram tana hma an lak dan pawh mipuiin an hriat tawh hnu a ni a. An tlinna bial ni sa, Dampa bialah an chak nawn leh a. Sorkar lai leh tlingsa bialah Congress an inrawlh ang chauh a ni a, Pu John Rotluangliana chuan hnuai lam atangin a kek ve ngar ngar ang a ni chauh a. Tuna Dampa bial inthlan hi ram puma boruak kal dan tur a hril phak lo a ti.

<><><>

YMA

Central YMA hruaitute leh Aizawl City Local Council hruaitute vawiin khan Central YMA Office Aizawlah an inkawm a, an thawhhona tur hrang hrang te an sawiho.

Inkawmhona Central YMA President Pu R. Lalngheta kaihhruaiah hian ILP chungchang te, dan lova hnamdang sumdawng tam ta lutuk te, Aizawl khawpui chhung kawng siam mek en zui chungchang te leh ruihhlo do chungchangte an sawi ho a.

Ruihhlo do chungchangah YMA leh Local Council te tanho a tul zia te, YMA leh LC ten hriatpuina lehkha leh NoC pek chhuah chungchangah fimkhur taka kal pui a tul thu te an sawi a, Pu R. Lalngheta chuan ruihhlo do kawngah chak takin hma lak a tum a, LC te tawiawmna an mamawh dawn thu a sawi a ni.

Aizawl City Local Council President Pu C. Lalbiaknunga chuan, YMA in ruihhlo do kawnga khawtlang tana tha tura an ngaih chu Local Council in lo dodal loh tha an tih thu a sawi bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

SAUDI ARABIA BUS ACCIDENT

Saudi Arabia-a Madina pana kal Umra sakhaw biakzinmi 42 chu an chuanna bus leh diesel tanker insut avangin an thi. Thudawn danin Mecca atanga Madinah pana an tlan laiin tukin khan bus leh truck hi an insu a. Mecca-ah sakhaw thil tia an zin haw lamah vanduinah hi an tawh ta a ni. Jeddah-a Indian Consulate General chuan vanduinah thlen hnu hian puih ngai te puihna tur helpline number a puang nghal a. Darkar 24 chhung duty tur insiam anih thu a sawi a.

Vice President C P Radhakrishnan leh Prime Minister Narendra Modia te chuan vanduinah thleng chu pawh atih thu a sawi a. Vice President Radhakrishnan pawhin mitthi chhungte a tawrhpuh thu leh hliam tuarte pawh an dam thuai theih nan duhsakna a hlan a ni.

<><><>

NZC

Northern Zonal Council (NZC) meeting chu vawiin khan Haryana-a Faridabad-ah Union Home Minister Amit Shah-a hova neih a ni. Northern Zonal Council ah hian Haryana, Himachal Pradesh, Punjab, Rajasthan, Delhi, Jammu and Kashmir, Ladakh leh Chandigarh te an awm a. Vawiin meeting ah hian Rajasthan CM Bhajan Lal Sharma, Punjab CM Bhagwant Mann, Haryana CM Nayab Singh Saini, Himachal Pradesh CM Sukhvinder Singh Sukhu, Lieutenant Governors of Jammu and Kashmir Manoj Sinha, Lieutenant Governors of Delhi Vinai Kumar Saxena, Jammu and Kashmir CM Omar Abdullah, Delhi CM Rekha Gupta leh Senior official te an tel a. Delhi Red Fort bomb puak avanga thi te sunna hun hman a ni a. State hrang hrangte thawhhona tha siam turte, tui inhman tawm dan tha zawk ngaihtuah tur leh hmasawnna hnate chak zawka thawh dan tur he hunah hian sawiho a ni.

<><><>